



ADRODDIADAU ARHOLWYR

**LLWYBRAU MYNEDIAD
CYMRAEG**

HAF 2019

LLWYBRAU MYNEDIAD

CYMRAEG

Haf 2019

Sylwadau cyffredinol

Diolch eto i athrawon Cymru am waith hynod o werthfawr gydag ymgeiswyr ar y lefel hon. Mae datblygu hyder a hunan werth ein dysgwyr ar y lefel hon yn ogystal ag ennill iddynt gymhwyster mor bwysig wrth eu paratoi ar gyfer llwybrau eu dyfodol.

Ychydig o bwyntiau i'ch atgoffa o ran y gwaith gweinyddol os gwelwch yn dda:

- Mae angen cyflwyno'r gwaith fesul uned ac nid fesul ymgeisydd.
- Mae angen tystiolaeth o safoni mewnol gan sicrhau bod rhywun arall yn bwrw golwg ar y gwaith.
- Mae angen ffurflen ddilysu ar gyfer pob ymgeisydd.
- Mae angen enw'r ymgeisydd, rhif arholiad yr ymgeisydd, a rhif y ganolfan ar bob darn o waith.
- Mae angen enwau'r ymgeiswyr fesul trac o ran y gwaith llafar.
- Sicrhewch fod ymgeiswyr yn cael eu cofrestru ar gyfer y lefel gywir. Gwelwyd ambell enghraifft yn y gyfres hon o ymgeiswyr yn cael eu cofrestru ar M2 ond roedd y taflenni marciau unigol a safon y gwaith ar M3. Yn anffodus nid oedd modd gwobrwyo M3 iddynt gan mai cofrestriad M2 a gyflwynwyd gan y ganolfan.

Diolch yn fawr iawn am bob cydweithrediad.

Sylwadau ar unedau unigol

Uned 6360 – Trafod Profiadau a Theimladau

Mae'n bleser gwranddo ar ymgeiswyr yn ymateb yn gwbl gyfforddus wrth siarad mewn iaith naturiol a chyfoethog gan drafod testunau o wir ddiddordeb a phrofiad iddynt. Cafwyd enghreifftiau o athrawon yn arwain mewn ffordd grefftus a naturiol wrth sgwrsio gan sicrhau bod ymgeiswyr yn cyrraedd y safon uchaf posib trwy holi cwestiynau agored. Fodd bynnag, yn anffodus, cafwyd enghreifftiau o ddisgyblion yn darllen sgript eto eleni, ac o ganlyniad nid oedd modd eu gwobrwyo gan mai tasg trafod yw hon, nid darllen. DYLLID OSGOI SGRIPTIO AR BOB CYFRIF.

Uned 6361 – Trawsieithu

Mae athrawon wedi ymgyfarwyddo gyda gofynion y dasg hon ar y cyfan, ond erys peth ansicrwydd o ran gofynion M3. Ar y lefel hon, disgwylir ymateb mewn dyfnder i wybodaeth a gyflwynir mewn dyfnder. Cofiwch fod angen deunydd ymestynnol ar gyfer M3, a cheir nifer o enghreifftiau o hyn ar wefan CBAC.

Uned 6362 – Ymateb i Ffilm/Rhaglen Deledu Gymraeg

Llwydda'r ymgeiswyr i drafod rhaglen/ffilm cwbl addas o fewn eu profiad mewn dyfnder, a'r goreuon ar M3 yn gallu cyfeirio at dechnegau ffilm. Nodwch os gwelwch yn dda ei fod yn hanfodol trafod TECHNEGAI ffilm/rhaglen deledu er mwyn cyrraedd M3. Eto, mae holi cynnil, pwrpasol gan athrawon yn angenrheidiol er mwyn sicrhau potensial ymgeiswyr. Mae

angen OSGOI SGRIPTIO o ran y dasg hon hefyd gan na ellir gwobrwyo ymgeiswyr am ddarllen sgript.

Uned 6363 – Ymateb i Ryddiaith

Mae hon yn dasg boblogaidd iawn a llwydda'r ymgeiswyr i ymateb yn ddiddorol i ddeunydd addas o fewn eu profiad a'u diddordeb. Cofier bod angen bwrw pob un o'r meini prawf, a bod gwaith M3 yn gofyn am gryn dipyn o ysgrifennu estynedig. Mae enghreifftiau i'w gweld ar wefan CBAC.

Uned 6364 – Ysgrifennu Stori

Cafwyd straeon o safon uchel gan ymgeiswyr a oedd wedi eu paratoi'n fanwl trwy gynllunio mewn dyfnder. Mae paratoi gofalus trwy ddarllen ac astudio nodweddion stori dda cyn dechrau ar y dasg yn codi safon gwaith ymgeiswyr. Gan y goreuon gwelwyd ymdrech i ddisgrifio a chreu nodweddion arddull a naws, a oedd yn creu straeon diddorol, gwreiddiol, a bywiog.

Crynodeb o brif bwyntiau

Mae'n werth bwrw golwg ar enghreifftiau sydd gan CBAC o'r tasgau ar M2 ac M3 ar wefan ddiogel CBAC er mwyn sicrhau dealltwriaeth dda o'r disgwyliadau ar gyfer y tasgau yn yr amrywiol unedau.

Rhaid talu sylw i'r meini prawf ar bob uned ac ar bob lefel. Rhaid i waith yr ymgeiswyr gwrdd â phob un o'r meini prawf ar lefel benodol er mwyn llwyddo mewn uned.

Rhaid pwysleisio na ddylid sgriptio unrhyw dasg lafar boed hynny yn dasg unigol neu'n dasg grŵp. Disgwylir trafodaethau naturiol.

Bydd y cymhwyster hwn yn dod i ben yng nghyfres haf 2020. O Fedi 2019 bydd modd addysgu cymhwyster newydd Lefel Mynediad Cymraeg a fydd yn cael ei ddyfarnu am y tro cyntaf yn haf 2021.



CBAC
245 Rhodfa'r Gorllewin
Caerdydd CF5 2YX
Ffôn: 029 2026 5000
Ffacs: 029 2057 5994
E-bost: arholiadau@cbac.co.uk
gwefan: www.cbac.co.uk